



說部叢書第三集第七十六編

風島女傑

商務印書館印行

813.7
661

13(26)



3 0527 1549 1

風島女傑

一千九百十四年。歐戰劇烈之際。我英治戎設備。方以海軍唯一之榮譽。雄稱於世。余投身行伍時。被擢爲海軍少佐。常隨大佐督率艦隊。游弋於北海之中。大佐以余年少。不畏難。頻加青目。一日。使余登氣球。任斥堠守望之責。球高出雲表。止一繩下著於艦。風烈球動時。有斷綆之虞。余登球數矣。從未一罹險。獨此次不然。余以傍晚。孑身附球尾。扶搖直上。御風而行。意滋恬適。距駛空不逾半時。巨聲一震。繩忽中斷。斯時。球脫羈縛。輕忽飄疾。幾如弩箭離弦。一縱千里。余身懸空際。旁皇無主。一任風力簸蕩。隨球上升不已。初凝睇下視。艦大僅如豆。繼則愈升愈高。并艦之蹤影已杳。周

迴四矚。惟見白霧迷漫。包裹此身於鴻濛大氣中。星光數點。半爲霧氣蔽隔。閃爍無定。而冥冥太空。萬籟沉寂。聞見渺一物。閱者諸君。試思余此時躬歷之境。其悲慘爲何如耶。顧余進行之勇往氣。不少餒。時而審風測勢。察地味。聆地聲。間驗視氣壓之表。以卜離地之遠近。久之。輕氣漸洩。知球將得陸而墜。默忖茲球墜處。倘由此南達德岸布爾琴。則不幸孰甚。或轉北而降荷爾士天。則吾人之幸也。無何。下降之速率遽增。約又歷半時許。始覺離地僅千尺以內。乃備衣服。手槍。易雨衣。挾墜身傘。撒手舍球而下。斯時余身之墜。雖隕星不足喻神速。飛鳥不足方矯疾。迷離恟怳中。第覺繞身之四周。霧光閃閃如電。一剎那間。目前黑暗境狀又大異往昔。繞身不復有霧。則已足履大地。屹立草田間矣。余至是略一定神。

始極目力周覽。髣髴一望平原。田野開闢。百武以外。石堵矗然。其下則麥田也。時夜色已深。幽闇彌甚。再遠視。則不辨人物。四顧并無廬舍之屬。不聞雞犬之聲。惟海鷗踏浪。拍翼作聲。遙遙可辨。知由此離海岸。或不遠耳。余茫無所歸。不識其地屬德意志。抑隸丹麥。姑去墜身傘。裹以亂草。密藏石堵之下。迎海浪聲而行。不數十步。突一人自叢莽中躍出。似久伏狙伺人者然。余愕立辨之。其人身穿雨衣。爲狀類漁者。因操德語探之。其人面呈訝容。囁嚅而言曰。子非病狂。此地何地。而操德語。子殆未諳英語乎。余頓悟此地爲我國領土。而聆其人之言。操德語甚熟。且純粹爲德音。度其人必德產。生而習之者。乃應之曰。余英人也。奚爲不稔英語。其人聞余言。立下其冠。高其領。幾欲盡翳其面目。并叩余曰。子何爲履斯

地耶。曰。此何待問。其人又矯首觀海曰。余不信子以舟來也。予久俟於此。而未嘗覩一楫。余曰。姑舍是。今欲得一夕宿。君能爲我下榻乎。曰。可。子且遲我於此。少須。俟予返而後挈子也。言畢。怱怱去。余目送之。其人去未久。旋聞噏唇嘯嘯聲。自彼方至。方猜疑是人而聲又繼作。比四望。杳無所見。乃坐以覘變。良久。無他異。其人亦不返。余心大疑。念其人必設辭誑我。我不早審之。致受其愚。毋乃不智之甚。已而轉幸余得奇遇。邂逅斯人。地旣屬英土。斯人必非土著。察其言動。斷乎異於是地居民。然則余適離太空之奇險。卽入奇境。吾生性好奇。所遭亦多奇。未始非天之錫我也。思至此。余轉樂甚。一躍而起。信步前行。蹢躅數百武。瞥見一田舍。短籬四繞。緊閉柴扉。趨而叩關。一老農應聲出。余具道來意。老農極口應許。

隨引余入。登草堂。命坐。并出妻若子見余。余一一爲禮。老農叩余姓名。余曰。僕馬龍佐也。現爲海軍少佐。老人自言爲史培德。指一老婦謂爲其妻。一女曰梅姝。二少年一名繼祖。一名作驥。余觀諸人。悉樸儉。具有田舍家風。獨作驥天真爛漫。輒目客憨笑。卽其狀貌。亦與諸人懸殊。殆非史老所出。惟余不便窮詰耳。余詢老人此地何名。老人曰。此蘭西島也。余念蘭西一名風島。與國之北陞軍區。隔離較遠。雖有犄角之勢。并無險阻之利。非形勝之要隘也。時余腹枵甚。老人似已知之。出疏食款余。余飯之甘。主人見狀。頗喜。并不究問余之所從來。惟加餐勸客。已則旁坐。徐吸淡巴菰相陪。蓋是時時計針已指亥末。田家早息。皆將就睡。以余之來。故遲其寢耳。余餐旣畢。老人示余旁間一小屋。藉草作茵。席地安枕。余感

其留客之誠。殊弗以爲簡慢。老人去。余體憊甚。因亦假寐。一宵鼾睡。迨翌日晨光射戶。好夢始回。亟披衣起。探問主人。知於黎明時已率子女往田間耕作。余詢得田疇所在。邁步趨其前。老人早望見余。輟耕以待。余謝昨夕之惠。且叩之曰。翁若此。田連阡陌。而猶耕鋤自力。意者此中自有真樂乎。史老矍然曰。敬謝君言。僕何人斯。安有此福。有此福者。皆吾林主人也。余曰。林君何如人。曰。主人爲此間鉅族。富埒王公。貲財累萬。凡島中之田。半爲彼有。如予者。特彼家之佃戶。爲吾主人僱用者耳。余聞其言。怦然心動。亟曰。主人何在。余卽今謁之。何如。史老曰。如此。則由此東趨數里。有甲第雲連。沈沈華屋者。卽主人之居。主人溫藹。見之或不拒客也。余感其指引。卽欲往訪其人。乃辭史老。並酬以膳宿資。却而後受。恩恩

告別。如老人言而行。且行且思。偶觸宵來穿雨衣之人。奇想頓生。彼以深夜無人。子身狙伏海濱。自謂久俟於此。所俟果何人歟。及聞余爲英人。則又立藏其面目。掩之不迭。際此戒嚴時代。軍務倥傯。陰謀間諜之徒。遍佈各地。蘭西雖僻處海隅。安保無奸人竄伏其中。乘隙以圖一逞。余於斯人不能無疑矣。當余與斯人問答之頃。彷彿其人身量修短適中。默睛而虬鬚。最易注目。其他細憶不甚了了。方摹擬間。突有崇閣大廈。起於百步之外。意史老所謂華屋。卽此是也。疾趨至前。抵一門。門洞闢。不見闔者。逕入其庭。庭盡有室。余從容摳衣。纔升階之第一級。室簾猝然自下。一人從室後出。體幹中人。鬚鬢有髯。瞪目注視余。余亟與爲禮。曰。林主人在家否。語未故綴以德音。其人曰。子欲見醫士乎。僕請爲紹介。言已先

入。余隨其後。既入室。一岸然道貌之醫士。亟起立。與余握手。余述姓氏畢。轉叩主人。醫士曰。鄙人林姓。東廬其名。隨指有髯者曰。此吾友敖賓年也。余道史老言及來意。東廬曰。先生誤矣。史仙所稱之主人。乃家兄輝烈。非鄙人也。賓年在旁笑曰。窮島何幸。值如許揚譽。余曰。敖君胡出此言。豈君亦茲島主翁乎。曰。僕非土著。惟島中事知之較稔。殊不願爲尊客諱。要之君所謂大廈。此間數之實寥寥。除輝烈外。此亦一部份。餘二則一爲禮拜堂。一爲牧師之居第也。醫士屢目賓年。賓年不顧而笑。余起告別。醫士亦不堅留。余既出。陰念此行誤入醫室。殊出意表。室簾猝下。必非無故。賓年之貌。與東廬之行。皆足啓人疑竇。尤可慮者。余所往訪之主人東廬。謂卽彼之兄。今其弟與客詭異已若是。則輝烈可知。然既已奔波。

至此。萬無半途折回之理。姑俟進見時隨機應變。總之莫令知我真相。爲第一要鍵也。計劃既定。縱步再東。斗聞背後有人厲聲呼余曰。止。余大駭。回視。則見一怪叟。箕踞坐道旁。容貌寢陋。衣服垢敝。紺其髮。而白其髯。顧余言曰。先生亦知此晴日乎。時余猶御雨衣。審其言。明明嘲我。不禁大聲叱之曰。干汝何事。若斯無禮。老叟似作不聞。曰。先生能假我火寸乎。余愕然不能答。急趨而過。驚訝幾失聲。斯島其迷島歟。以余今茲所見。如岸際之人。醫室之客。道旁之叟。抑何離奇怪誕。墮我於五里霧中。百思不得其解也。雖然。余敢誓言。必破此疑城而後去。行久之。塗漸寬廣。一望平坦。遙見當吾前者。傑閣巍峨。重樓璀璨。知距目的地不遠。久之。抵其處。參天古木。排列兩行。時當秋仲。商飈吹動。葉密陰深。烏鴉數百。成羣。

盤旋樹頂。啞啞不已。道之轉角。斜露蠣粉牆一帶。上垂薜荔。古色斑斕。沿牆以內。徧栽叢樹。剪伐整齊。高出垣端約寸許。由此繚繞向南。得一環式鑿花之鐵門。雙扉緊掩。闔其無人。余步至前。逕按其鈴。門呀然啓。一蒼頭肅客入。隨導至園林。由左旁一甬道曲折穿過。道以小石砌成。光滑且平。兩旁細草紛披。中隔短籬。徧植名花異卉。秋色鮮妍可愛。瞻眺未竟。瞥覩有女郎自內出迎。翩若驚鴻。長裙窄袖。玉貌娉婷。年事約十七八許。微啓櫻唇。問余訪誰。余鞠躬以林主人對。女郎含笑迓入。抵一廳事。是屋比連五間。高約四層。廳居其下。崇閎軒敞。雕鏤精工。文石作垣。氍毹鋪地。瓶罇彝鼎之屬。似皆購自支那。羅列古雅。潔淨無纖塵。右偏套室。帷幕啓處。皤然一翁。危坐椅中。女郎止步。余趨前致禮。林老答甚恭。余道

姓氏。申述史老之言。且曰。僕素業商。此來道經貴島。深愛風土清嘉。徘徊不忍遽去。迨聞史老稱及盛名。爲一方領袖。是以不揣冒昧。晉謁龍門。藉識荊州。以誌敬慕耳。林老軒渠曰。村農無知。先生過聽。老朽安敢當。先生不遠千里。來此荒島。足見雅人深致。自是不凡。今幸玉趾賁臨。蓬華有光矣。日來老夫正苦無良伴以解岑寂。倘不嫌蝸居狹陋。敢以此屈先生下榻。何如。余聞言大喜過望。急忙道謝。時女郎在側。林老指謂余曰。此弱息娟妍也。老夫止生此女。愛若掌珠。是兒亦可人善解。予意余就與爲禮。娟妍應接周至。一舉一動。態度俱極嫺雅。余於斯時。接近芳容。始得仔細端詳。覺其凝脂之膚。不施粉澤。斌媚純出於天然。其眉宇間。又別具一種英爽氣。殆巾幗而丈夫歟。無何侍者傳餐。林老殷勤款余。余既

認林爲東道主。卽亦不作虛文遜謝。遂偕父女相將至餐間。煥然一室。几筵羅列。水陸雜陳。林老引觴勸酬。意興頗豪。酒酣縱談時事。詞鋒犀利。痛快淋漓。多出人意表之論。娟妍吐屬。溫文清談。娓娓。父風筵撤。進咖啡。小飲逾時。復入套室。談論終日。竟不能測彼父女之底蘊。余心甚異。日旣夕。余請於林老曰。僕此來倉猝。未去雨衣。服之不衷。身之災也。明公不以爲不恭。猥以客禮見待。鰥生何幸。惟仍衣雨服外出。恐礙觀瞻。今欲假公一襲。以易此衣。未識公能許我否。林老面露訝容。口連稱可。遂掣鈴召侍者。導余入廳後左偏之一室。室小而精。掃除潔淨。銅床玉案。几椅瓶鏡。漱盂之屬。一一具備。以專供來賓之下榻於斯者。已而林老偕一女傭。攜包踵至。開袱則褐色新製之袍也。林老以袍授余。余試之適

體。時余偶睹。室旁一書檯。乃指一邊之屨。謂之曰。僕欲以所易之衣置其中可乎。林老尤錯愕。徐答曰。惟命。語畢逕出。斯際室中無人。余卽加袍雨服之上。空其屨而扃鍵之。復出見林老曰。僕敢乞公賜一火寸。公有之乎。林老詫甚。曰。憶老夫尙有家藏者。但此時未敢報命。容徐覓之。余一再道謝而出。少須。各就寢。翌晨。爲來復俗尙禮拜。島中無論男女老幼。悉奉耶教。信仰尤切。是日天纔拂曉。林老已率女公子往禮堂早禱矣。余晨興無事。因亦步往觀禮。所見島民。熙來攘往。絡繹不絕。且皆如義皇上人。耕田鑿井。自得其樂。幾不知有歐戰事。島中禮堂凡二。各有牧師分司其職。是時一牧師適撓疾輟講。故島人紛紛咸齎集於此堂。堂制崇式古。壁石嶙峋。少加雕琢。斑駁可愛。余入門時。讚美甫畢。琴聲悠

然而止。登壇者爲一古心古貌之牧師。朗詞演講。藹然皆仁者之言。島人聆其緒論。莫不歡忻鼓舞。肅然致敬。余至是又私歎此非迷島。殆世外桃源焉。已而衆散歸。余亦覓得娟妍。與之同返。出禮堂數武。余叩之曰。今日之會。可謂盛矣。然不見令叔東廬及敖賓年何也。娟妍曰。彼輩蹤跡無常。此間非數至者。余曰。尙有一老亦未至何也。娟妍曰。何人。曰。白髯紺髮。敝衣垢面之叟耳。余嘗見之於令叔醫室附近之道中。娟妍細思良久曰。島中無此叟也。余曰。密司之言信乎。曰。實不誑君。余遂不言。旣歸。已具午餐。餐後不耐家居。思出外運動。又獨身行半里。頗覺惆悵無聊。乃自身畔出手槍。擇隙地作擊石之戲。余幼習射藝。槍法素嫻。發必命中。故常用以取樂。是時。余正撥機瞄準。彷彿樹旁有人佇立。默窺余技。回眸

微睨。神經一震。陡然有所感觸。仔細思索。似窺我者。酷肖前夕海涯雨服之人。余心大疑。急定神審視其面。則史老之子作驢也。作驢呆立吾前。熟視若無覩。余藏槍於懷。微叩之曰。別纔兩日。祝君納福。尙識我否。作驢不答一語。吃吃憨笑。目余不少瞬。余故作隱語曰。是地何地。余久俟於此。而未嘗覩一楫。作驢突啓口曰。否。島中有舟。百有六也。余曰。此地風俗喜用蠟製火寸乎。作驢縱聲狂笑。余亦爲之解頤。余復詢之曰。子恆往來島中。見有能諳德語之一客耶。曰。否。旣而曰。然。余曰。其人雨服而小冠。默睛而多髯。恆以夜出。子嘗見之否。作驢搖首不應。余見其憨狀可掬。坦然不疑。乃探囊出銀幣一枚贈之曰。此後子倘遇是人。幸卽告我。并示以地點。作驢允諾。歡謝而去。時夕陽銜山。暮色漸暝。余亦恩恩循道歸。

進夜膳畢。方與林老娟妍在室中間話。侍者以手書進。林老發閱。竟謂娟妍曰。吾今卽出。夜或不返。汝莫予待也。語已。遂入寢室。易衣而去。余詢娟妍而翁何往。若是恩遽。娟妍曰。夜巡耳。余曰。何謂也。曰。吾國自與德人絕交。動員令下之後。茲島奉海軍主將之命。畫爲若干區。區各支配人數。設團自衛。凡島中精壯男子。例須任守土之責。故亦一般按照海軍編制。訓練成團。遇有警耗。或出防。或備戰。由團司令臨時調遣。莫敢不遵。若今之夜巡。以吾父主守是區。應盡團民一份子之義務也。余曰。然則北岸鄰近史老之區。孰守之者。娟妍似訝吾言。隨答曰。家叔與敖賓年耳。余忤然心動。曰。彼二人勤務亦若而翁時出者乎。曰。敖賓年多於家叔也。余曰。執干戈以衛社稷。一方之事。卽一國之事。國之安危。匹夫有責。今

夕僕幸無事。往助一臂何如。娟妍駭然曰。先生亦往耶。余曰。僕奚不可。曰。然則妾亦偕往耳。余曰。惟命。遂相將並出。既登大道。娟妍曰。吾儕將安往。余曰。北岸何如。娟妍頷首曰。可。於是取道向北行。時宵深露重。天空無月色。寒星數點。籠罩於微雲縷之中。半明不滅。海風吹面。膚寒起粟。四顧鬱蒼。景色淒絕。彳亍行來。漸近北岸之石堵。余猝然止步。娟妍亦停趾以待。余曰。吾儕止此奚爲。娟妍曰。守望可耳。余曰。沿途何未遇一人也。娟妍曰。此道路綫延長。止一人守之。故爾寂寂。余驟聞有聲綽繚。自遠而近。似出由海灣沿灘一帶者。然其間峭石森立。灌木叢雜。勢頗險惡。娟妍傾耳久之。謂余曰。先生聞之乎。余曰。固也。密司并有所見否。娟妍曰。無。余曰。此間岸高若許。縱有奸人。身無所蔽。僕且下水濱探之。娟妍未答。

余遽躡足蜷身而降。聞石側砰然聲作。亟趨向前。纔及兩崖之間。突一物修而銳。猛斫余首。首少偏及肩。去僅以寸。余大駭懼。伏身匍匐。蛇行徐退。反奔及岸。則見二人方刺刺偶語。余出槍按機而前。一人高呼曰。來者莫非馬龍佐先生耶。余習聆其音。知爲林老輝烈。卽應曰。然。林老曰。先生曾見一人否。余怒曰。未也。已復斂容曰。林公何來。娟妍曰。適至耳。余曰。異哉。可謂不期而會於此地也。林老曰。先生勞矣。儻無事偕返何如。余唯唯應之。於是輝烈娟妍攜手前行。余踵其後。歸途別無他異。抵家各就寢。余無端受此激刺。思潮重疊。盤旋腦海之中。竟致終夜目未能合。曙色甫動。略入甜鄉。不久亦驚覺。推枕而起。紅日纔上竿頭。余儲備餽糧。恩恩卽出。蓋欲窮昨夕事也。出門循舊路疾馳。不頃刻。旋抵北岸之石崖。

其時海潮適漲。浪花飛捲。水珠四濺。沙渚盡沒。余就岸旁周繞偵察。一無所獲。舍之更前行。得一巉巖。其麓有磐石。光滑如鏡。據而小坐。以身背巖。坐既定。覃思未已。耳畔槍聲頓作。飛一彈。斜掠余身而過。逕穿穴一樹腹。戛然始止。余未及興。一彈續至。余躍起。一彈又發。丸着坐後巖壁之上。力猛反動。因而折回。適擊中余之左腕。傷焉。余振右臂。袖槍超騰而出。徧覓狙擊傷我之人。正如鴻飛冥冥。莫知所止。惟有秋林落葉。鑒戰金風。喧逐一片而已。驚魂少定。疑慮滋生。撫腕創幸尙未劇。乃信步故緩其行。纔出一交叉路。作驢迎面奔來。吁吁氣喘。返身指曰。生客至矣。余隨其指觀之。十餘丈外。果見一人蹀躞而前。余出銀幣酬作驢。馳迎來客。旣近。審之。則敖賓年也。賓年瞥覩余。駐足問曰。君早來何往。余曰。海涯一

游耳。賓年笑曰。樂哉游也。余曰。不然。特余性好奇耳。余又詢昨日禮堂不遇之故。賓年曰。前者適抱采薪之憂。今幸少愈。一出散步。君倘有暇。尙希惠臨賜教。言已。揚長去。余疑不能釋。遙尾其後。時余創傷痛甚。步履艱澀。一轉瞬間。賓年去遠。蹤跡已杳。無何。經一處。巍然石堵。矗立在前。余憶疇昔之夜。以茅草裹墜身。傘瘞埋其下。今或無恙否。比驗視。發掘形迹。顯然呈露。傘已遍求不得。余至是。始大驚駭。頓悟余之來此島。黑幕中必有奸人窺伺。務敗吾謀。而余尙夢夢。初以好奇之故。欲希蹤間諜。一試鉤鉅之能。豈知身墮他人彀中。危機四伏。如今日之事。設非天幸。身亦殲矣。然則向所視茲島爲桃源樂土者。由今觀之。直虎穴耳。安樂云乎哉。急舉足奔。重返輝烈之居。入門抵寢室。於心少安。失眠竟夕。斯際精神

微倦。欹椅小憩。腦筋突一震動。念夜來林氏對我。神色有異。不知爲禍爲福。偶睇案屨之鑰。似有人移動。非復原置之所。審之。且已易一新者。余益忐忑不寧。當余初謁林氏。固隱我之真相。僞爲商民。冀以調刺其私。而燭寸之間。昨夕之出。適啓彼之疑竇。今果發屨探我真僞。則我之藏衣不實。必爲彼所窺破。而益觸其忌。余乃重入侯門。寄居籬下。是自投羅網也。然一論余經歷之始末。今之流寓於斯。或亦天實爲之。不墜我於滄溟之海。不落我於戰鬪之場。獨投我於此荒僻之一島。誰謂蒼蒼非有意歟。是則岸際之獲遇奸謀。醫室之覷破賓年。途中之突逢怪叟。連帶而有今日之險。莫非天命。所謂莫之致而致者。非我召之也。若夫林氏之疑。固啓於余之故爲異行。然使該氏知有我在。懼而不敢逞其陰謀。則亦

未始非計。且成事不說。未來之禍。安能逆觀。余惟謹慎將事。一切付之自然已耳。思念及此。天君轉覺泰然。時已日晡。飢腸轆轤。因出餽糧啖之。半晌。聞有橐橐履聲。由門外達內。至余室而止。余知有異。出手槍待之。門闢。一偉岸軍官。昂然直入。勳章燦爛。戎服武裝。廣頰豐頤。目具神威。一望而識其爲余之表弟尉約翰。海軍中佐也。約翰後隨以娟妍。立闕外。不進眉微蹙。若有隱憂者。余別約翰兩載於茲矣。歐戰之初。約翰奉命督軍。駐守印度。曾未一回故國。余積思成癆。屢欲修書問訊。卒因於兵戎俶擾。阻絕交通。今幸於此地邂逅遇之。驚喜實出望外。轉疑如在夢中矣。約翰踏步入。驟覩余。失聲呼曰。子非龍佐表兄耶。余喜極。雀躍曰。約翰。不圖今日見爾。約翰隨閉其門。歡然坐下。余曰。表弟何來。曰。余反自印。適

掌數艦爲巡弋海面之職耳。約翰見余槍未釋手。呵呵笑曰。龍兄持武器何爲。殆甘一死。欲刼彼姝歟。第吾觀此美而豔者。心不爲動也。余亦軒渠曰。吾弟恢諧。不聞久矣。今尙如舊耶。約翰大樂。余曰。兩年契闊。且未暇與子詳叙。弟突如其來。實獲吾心。惟今者事急切。望先挈余至艦中。離此險地。約翰曰。兄將不辭而去乎。曰。固也。弟非受林氏之召來者耶。曰。然。急電召我耳。曰。然則請從此起。何辭彼爲。言次。離坐。相將把臂出。及至廳堂下。扈從衛士排列若鴈行。軍服執刀。亮如霜雪。一似準備拿人獲功也者。驟見中佐與余攜手同出。皆吐舌噤口作愕眙狀。目睽睽相余不已。旣出林氏門。余於途間續詢約翰曰。輝烈父女何時召子。曰。當在今晨。余艦一路巡邏。適經是島。據電後。以候潮未能近岸。故遲至此時。電文

具名。止輝老一人。娟妍實無與。幸毋冤屈彼妹。余笑謝曰。知過。但輝老電中云何。曰。電話殊簡單。大旨謂頃來一生客。不審何繇飛渡至此。蹤跡詭祕。有似間諜。幸速臨逮。問云云。余憮然曰。其然乎。問答間。已抵海灣泊艦處。約翰邀余登艦。入一密室。促膝語余曰。兄究從何來。吾聞人謂兄有墜身傘。確否。余爲縷述三日來經過事。并出腕創示之。約翰曰。怪哉。窮鄉僻壤。乃竟有奸徒竄伏。陰圖不逞。彼軍區主保治安。職司安在。吾兄以局外之身。代謀偵緝。所指重疊疑點。滿貯胸次。理想非不高妙。惜於事實上。左證未具。不能武斷執行耳。至若兄此次之主於林氏。其形迹亦太過於恢詭。不然。何致動彼疑心。誤爲間諜。顧自今以後。度彼一家。殆已渙然冰釋矣。余曰。或如子言。雖然。林老之爲人。吾弟知之深切歟。約翰

曰。素昧平生。烏乎知彼。余曰。人情多詐。安知輝烈不別具肺腸。與其弟相爲狼狽哉。約翰默然久之。乃曰。兄今將若何。余曰。我原擬久留林氏。以覘其變。今已去之。當然不再往。創傷雖微。須早療治。目下姑暫歸。再作良圖可也。約翰曰。此間事弟雖不才。願助一臂。但須假以時日。或能稍獲端倪。自今日起。請爲君蹤跡之一俟。兄體痊。可復來。以成厥功。何如。余諾諾道謝。約翰立命部曲率第二艦載送余歸故里。一聲汽笛。破浪東行。瞬息間。遠離風島而去。舟中無事。作一函達海軍司令部。備述汽球遇險之由。并援例呈請給假回里調養云云。旣歸數日。腕創已瘥。懸念島中事。耿耿不少釋。閱日。果接得約翰少佐來書。發自風島。啓封讀之。謂吾兄去島後。卽延名探潘蕙敦。從事物色。奈彼所得無幾。彼云。島俗樸儉。士

族除林氏父女外。殆無一人能諳德語。敖賓年乃一酒徒。終日耽於麴蘖。就醫林東廬之門。今已離島矣。白髯紺髮之叟。俱云無是人。雖按戶窮索。終不一面也。余閱至此。不禁喟然太息曰。惹敦愚而僨事。表弟奈何任之。余知此行。非我不可。然必待約翰來。細加研詰。着手尤較易耳。乃約翰書中謂巡弋事竣。不日卽至。今何遲遲。於是電催約翰。速其來。逾數日。余方鬱伊居家中。約翰突自外入。余喜曰。約翰來何晚也。書中言所得之效果。盡於此乎。約翰曰。弟殊愧無以報命。今兄創傷愈否。曰。愈已多日。邇來優閒養福。性實不耐。隙駒虛度。情更難堪。所以促弟急來一商者。擬卽首途赴島。以此事自我始之。當自我終之也。吾再詢子。林氏父女至今無奇異舉動耶。何書中不一言及之。曰。無也。余曰。賓年去後。弟曾一

晤東廬否。約翰曰。若論東廬。其人亦殊可笑。憶一日。彼特來乞我。謂彼生涯清淡。拮据特甚。向所度日。賴有賓年。供予之求。忽又舍我他去。今欲重得一酒徒如賓年者。惠顧荒居。藉取其資。以圖餬口。故逕詣先生前陳請。余辭以無病不須就醫。奈彼勸之不已。復一再哀求。察其情狀。似非僞飾。不得已。勉允其請。旋幸離島不果。由今思之。此事不能無疑。余曰。此必賓年之計。東廬甘爲其傀儡也。雖然。彼旣云云。余甚喜得一進身之機會矣。約翰未悟余旨。愕然問何謂。余曰。無他。吾欲僞應酒徒之召。再登醫士門耳。約翰曰。不可。兄去島未半月。聲音笑貌。猶在彼人心目中。詎不熟識子爲前度劉郎乎。余曰。無慮。疇昔留島。止有三日。東廬更一面耳。今去祇須借助化粧品。益髯而易容。裝髻而變服。縱彼明如離婁。孰識

我者。約翰曰。子言雖是。然適聞兄論。謂東廬之求。出自賓年之策。既知兩人鬼域。而猶貿然投身。非自危之道歟。余曰。不入虎穴。安得虎子。畏首畏尾。事何以濟。身之安危。聽天而已。惟余有一言。乞弟注意。此行將易名爲霍唐士。有急當以電召。幸卽率艦來無誤。約翰見余堅執前言。知不能阻。諾諾連聲曰。謹候兄命。余略事摒擋。卽登約翰來艦。開回風島。約翰一再囑予謹慎。揮巾而別。於是展輪再北發。沿途無事。季秋中浣。余復抵蘭西之島。海天空闊。崖壁嵯峨。雖風景不殊。頗增今昔之感。旣艤舟。舍之登陸。忽促命駕。造林東廬之門。醫士延入。詢余來意。余飾詞應之。語及賃居廡下。醫士甚喜。余察醫士神色。無少異。頗以爲怪。更與坐談良久。漸覺其人和易近情。與人無忤。晚餐甫具。余故笑問主人有佳釀未。曰。

有紅酒。於是洗尊共酌。兩情益洽。酒數巡。余探之曰。僕性疏狂。好使酒。此後或以不韙見罪。先生幸恕我。曰。醫家何忌之有。余曰。然則先生嘗見酷嗜杯中物若僕者乎。曰。有。有。卽如數日前。客有敖賓年者。其飲量之豪。殆過於吾子。特其人粗率太甚耳。余訝醫士竟名敖賓年。疑其別有深慮。乃應之曰。恨僕來遲。失之交臂。非然。僕又多交一坦蕩之好友也。醫士曰。彼生平好浪游。足跡常遍天下。今之行蹤。或在美洲新大陸。是未可知。君果欲見彼。由鄙人紹介。覓之良易。蓋璞士謀甫之厓林路五十號。卽彼英倫之居。停主也。余默然。因縱論他事。醫士亦不深問。無何。席散。醫士外出。余乘間步入內室。觀其簾。簾已高捲。曳其繩下垂至地。如昔日狀。不悟當時何以猝然自下。細審之。又別無破綻。意者余前次之來。醫士

方與賓年密議。不圖余掩入。乃下簾而使賓年出逆我耳。然彼所議何事。何故不令人聞。此中亦一疑點。要之欲破醫士陰謀。必非一朝一夕所能奏功也。籌思之頃。東廬適入。勸余早息。余從之。翌日晨興。東廬見余枯坐無聊。爲詳論島中風土人物。并及其兄輝烈。余聞輝烈名。佯爲不識。絮絮研詰。東廬答述甚詳。且請任介紹。謁之。俾朝夕過從。得以隨時遣悶。余正患面輝烈無術。會醫士肯先容。深愜予意。遂欣然請往。同登輝烈之門。輝烈聞其弟偕一客來。殷勤延納。款禮甚至。東廬代述姓名畢。娟妍亦在座。互道寒暄。賓主頗相得。輝烈父女。胸襟豪爽。不減往昔。余則矜持過甚。談吐間。故數數及考古之學。繁稱博引。以資辯論。輝烈於斯學門徑雖未深邃。而每發一語。俱中窾要。益以醫士之沉潛。故共話一堂。彼

此皆相見恨晚。獨娟妍在旁。目灼灼屢注余。若有所思。余踟蹰不安。輒避其目。偶回眸流盼。娟妍意似覺察。嫣然一粲。余幾無措。幸其時輝烈昆仲談興正酣。意不他屬。未爲所見耳。薄午。輝烈具盛饌饗客。一座盡歡。宴畢。余與醫士興辭而出。輝烈堅留不獲。余旣歸。謂東廬曰。若兄誠人傑哉。島中有斯人。足爲山林生色矣。東廬曰。謝君過譽。予兄亦蠹鄙猶人耳。余曰。然則此中孰爲傑出者。東廬曰。窮島荒陋。居民率碌碌無奇。不堪月旦。余曰。貴島遠隔塵囂。可謂世外桃源。今歐陸有事。四郊多壘。烽燧燭天。獨此間一片乾淨土。坐觀觸蠻之鬪。藉供談笑之資。非福地而何。東廬曰。否。島雖偏寂。常有奸人窺伺。希圖一逞。故島人對於防衛事宜。莫不夙夜兢兢。戒備唯恐不至也。余急問曰。然則島中亦有異聞乎。曰。安得

云無。卽如上月。發生一事。至今猶疑不能決。子旣樂聞。試爲子縷述之。余傾耳之下。方以彼之云云。於我所偵事。不無少有補助。詎知彼所述者。正余前次爲不速客。款門求見事。并歷舉余之口操。德音。舉動。詭譎。暨留居輝烈之第。僞扁所御服。迄被疑受拘而止。長言滔滔不絕。余默然有頃。乃曰。如先生言。此人究爲何如人。曰。不知也。但其人自稱爲馬龍佐云。以舟來。然此間島人有搜得其所藏之墜身傘者。余曰。墜身傘。果屬其人歟。且若人來島。胡爲東廬曰。想必有異謀耳。余曰。然則輝烈先生旣與之居。當能察之。東廬曰。余兄不能察也。惟姪女娟妍。機警過人。或有所得。然諱莫如深。雖知亦與不知等耳。余又默然。旣而嘆曰。怪哉。語未畢。東廬連頷其首曰。誠怪。時余見案頭置有雪茄。因取一枝。燃火吸之。

實則余素無此癖。煙縷縷自鼻觀出。而方寸中則冥想適間一席話。轉令余愉悅迷離。無以自解。念醫士之爲人。果否誠慤無辜。輝烈之疑我。豈真一無容心者。設使彼言不誣。匪特我之臆測完全失敗。卽兩番冒險之精神。亦屬徒勞。况破人祕密。而反被嫌疑。一身之名譽。且莫論。其爲庸人自擾。咎實難辭也。繼又念輓近人心。壽張爲幻。若彼東廬者。安知非胸藏城府。不露圭角之徒。倘因其片言遽信之深。示以真相。是不啻墮彼彀中。烏可哉。思潮重疊。正迴想間。東廬似覺。問曰。子何思。余曰。吾思此奸徒殊可恨。何併此彈丸一島。亦覬覦而圖破壞耶。東廬不語。莞爾而笑。余亦乘機趨出。是夜就寢後。決定明日將遍游島中。從事探訪。翌晨黎明。興余辭醫士。藉口癖嗜古學。攜鋤鍤出門。途中或穿鑿以求陳跡。或

詰問以刺故實。因是得遍謁遺老。凡年自六十以上之耆民。皆一一與之傾談。史備德之廬。亦曾造訪一次。作驥認余爲鑒古家。彌惓惓致意。若是者數日。早出暮歸。形神甚瘁。幸醫士未嘗有疑心。且津津爲余道島中舊典。然余之志固不在是。余之出行。或有得或無得。反必致意研察。比附而論斷。由此推知。島民心術悉皆安分馴良。絕無異謀。而奸徒之匿處。則別有蛛絲馬跡之可尋。惟彼東廬輝烈之嫌疑。又屬一問題。不能強合併入也。一日。余歸較早。方自一老農家返。入門。覺有客在東廬。見余立起身迎。爲我介紹。蓋客爲余之表弟尉約翰。余早一望識之。但此時不便遽認。僞爲素未謀面者。彼此周旋良久。余故莊肅其容。致敬如見大賓。已而醫士留約翰餐。餐已。約翰告別。余亦托詞考古。相繼隨行。行十數

武。離東廬門較遠。約翰反顧余曰。曩者送君行後。弟日擔憂。今喜無恙。惟兄來此幾一來復。所事亦少有端緒耶。余曰。尙未。前所疑醫士東廬。及伊兄輝烈。由今言之。轉令予失望。不能臆斷其真僞。因備述醫士之言。約翰曰。然則斯島果無一外人耶。余曰。否。使斯島無一外人。則余向者所目擊之白髯紺髮怪叟。究從何來。所身受崖下之槍傷。又豈無因而至耶。余今所知者。此萬惡之奸徒。當別有一人。惟不審誰爲窩主耳。約翰曰。兄論雖是。但奚所見而云然。詎彼怪叟已跡得歟。余曰。見則未能。然頗聞有人道及者。曰。何如。曰。余適自一農家來。與論古事。其人談興甚豪。娓娓無倦容。間涉近聞。則謂其女孫嘗於數日前。目覩一斑白老翁。健步如飛。疾奔向海濱去。詢其狀。與余所見。絲毫無二。叩其地點。則云密邇醫

士之居。豈非奇事。約翰曰。兄殆信彼老翁奔往海濱去。不一趨醫士室。遂斷醫士爲非其徒黨耶。余拊掌曰。善哉汝言。約翰方啓口答余。路隅忽轉出一人。迎面而立。驚視之。則密司林娟妍也。約翰急探帽趨前爲禮。娟妍曰。難得少佐亦在此。約翰述交余之因。余亦道數日之別。娟妍曰。先生久未臨寒舍。家君盼望甚殷。乞明日命駕。余允之。娟妍如穿花拂柳一般。徐徐別去。約翰曰。兄來此數日止。一見彼面乎。余曰。然。誠以彼娟娟者之目。殊可畏也。約翰問故。余告以造訪輝烈一節事。約翰粲然曰。兄誤矣。彼之屢轉秋波不已。或以愛情屬君也。余曰。弟真善謔哉。惟吾方恐適來之問答。爲彼一一竊聽耳。余明日萬不能不往彼家一探。約翰曰。然則弟今且別去。免啓人疑。余頷之。約翰乃別。次日晨起。余卽往顧輝烈。

之居。及門。適遇娟妍。恩恩自室中出。笑問曰。先生來何早。余曰。女士難得出游。僕當入謁尊翁。娟妍曰。否。妾每晨必出。出必散步野外。一吸新鮮空氣。先生儻無事。何妨偕行。余曰。願從。於是兩人蹀躞而前。取道逕指北岸。余心甚異。念彼自由散步。隨處可行。何必拘定北岸。故與前月夜行相犯。豈此道爲彼常川所涉足乎。抑無心偶合乎。方忖度間。已行抵岸之石堵。娟妍猝然止步曰。吾儕將安往。沿途何未遇一人也。繼又目注海灣作傾耳狀。曰。先生聞之乎。余睜眙無以應。娟妍失笑曰。殆波濤聲也。妾意此崖下必有石穴罅。多竅而空中。先生志在考古。盍一探之。余審睇此崖。卽前夕被擊處也。顧欲窮娟妍究竟。姑如其言。降身至水濱。周迴一視。但見大石峻嶒。小石犖确。俱乘潮退時呈露沙際。朗若列眉。余覘之。

良久。覺無異。復聳身上。娟妍曰。先生有所得耶。余曰。未。娟妍曰。然則歸休。余應曰。可。途中。娟妍并不涉他語。既返。輝烈在複室。見余甚喜。互致殷勤。約談一小時。始辭彼父女而出。既出。追想適間北岸一游。明慧如娟妍。必非無意。且所問訊。詞亦奇在與前不易一字。是明知我霍唐士。卽昔日之馬龍佐。而故以身所經歷者試我也。惟我之假面具。既已揭破。勢將重蹈覆轍。不能困彼而轉困於彼矣。可奈何。思至此。余益慄慄危懼。幾不敢登醫士之門。繼念舍此一枝。身更安寄。無已。一履其闕。卽奔入寢處。扃門以坐。幸東廬目的。祇在金錢。但償其值。一切弗問。余因此轉得自由。一日。余偶步露臺。臺在余寢室之後。高踞屋巔。遙望數十里外。海天風景。一覽皆盡。是日瞻眺間。瞥覩一巡洋軍艦。駛入海灣。傍島岸停泊。辨

其旗幟。知爲祖國之幼盧寄艦。幼艦於歐陸之戰。屢建奇功。敵人聞其名而喪膽。今忽旋於此島。殆必有故。於是披衣出門。乘間探訪一切。不數里。見艦中水手。紛紛登岸。三五成羣。絡繹於道。並有多數兵卒。徑叩農家門。購置雞雛羊豕。及酒醪蔬果等物。纍纍盈筐。肩負臂挈歸船上者。面皆欣然呈喜色。余信步過史備德之莊。三水手方滿攜雞卵。若酥油酥酪以出。史繼祖作驥二人立門內。遙送以目。且討論其所償之值。作驥更笑不可支。見余略一點首。卽探囊出金錢以鳴得意。并告余該艦道經茲島。須逗遛數日始去。則吾人所獲當倍豐也。余唯唯應之。仍循故道返。比抵醫室。東廬遲余久。因與論幼艦事。東廬曰。彼武夫殊饒於資。幾羅致島中物品而空之。余兄田園蔬植豢畜。殆爲彼搜索無餘矣。余曰。適從

史老村莊來。已稍稍見之。東廬曰。奚獨史老。凡島中農家。莫不波及也。余韙其說。夜餐既畢。余返寢室。甫坐定。倏聞警鐘亂鳴。人聲鼎沸。心知是火。亟馳登露臺探望之。遙見海天澄碧中。紅光一片。照耀如赤城之霞。下繫之一軍艦上。烈燄燭空。星飛煙冒。火勢正熾。余大駭曰。幼廬休矣。突有一人攀余臂曰。霍先生亦來觀此慘狀耶。余諦視之。醫士東廬也。漫應曰。然。旋退歸室。默念此艦之燃事至奇特。於此益證奸謀之謀非妄。顧欲偵其祕密。與前所遇之怪叟。必同出一途。此可斷言也。余又憶約翰不已。料約翰知此事。必來見我。翌日晨興。余靜待約翰。約翰未來。忽東廬遽入。謂余曰。有潘蕙敦先生者。特來謁君。余曰。此人素昧平生。見余何爲。東廬曰。不知。但客需君甚急。言已自去。余振衣出堂中。一人狀貌魁梧。

觀余卽起立。施禮曰。霍唐士先生。尉中佐有書致子也。語次。出一函。余啓誦之。具言幼艦遇險。事出非常。潘蕙敦銜命偵探。弟特使其面謁台端。俾資援助云。余閱竟曰。足下卽潘蕙敦先生乎。僕來此島緣因。想足下早有所聞。曰。如先生言。稍稍聞諸中佐矣。惟抵島後。經過情形。尙乞一一告我。余爲歷舉所見。詳述無少隱。蕙敦注意傾聽。沈吟半晌。謝余曰。鄙人今且一行。詰朝當再來。遂恩恩去。蕙敦旣出。東廬隨入。絮絮叩余蕙敦以何事來談如許久。余誑言他事以應之。東廬坦然不疑。次日蕙敦果瞰醫士之亡復至。余趨前握手曰。足下此行。欣然似有喜色。果一戎衣而事已大定耶。蕙敦曰。幸不辱命。雖然。尙不可以語君。俟今夕鄙人來。偕先生同出。以竟厥功。何如。余駭然曰。足下果有驚人絕技。神妙不測。一至

於斯。僕愧不如矣。蕙敦遜謝而去。余獨留室中。自慚且悔。繼念蕙敦頃間一席話。言大而夸。未必可信。盍蹤迹之以覘其術。乃急傳進膳。膳畢卽出。取道仍指西北行。途人若男若女。若老若少。皆紛紛談論幼艦事。余隨處留神伺察。未遇蕙敦。深爲詫異。偶憶燬艦。馳赴北水涯立而望之。杳不可見。忽覺數十武外。有人俟余。以爲蕙敦。亟趨至前熟視。則史作驥也。作驥覩余近。躍而迎曰。此間有大石。瑰異殊可觀。余曰。豈古石耶。作驥攬余臂曰。先生試自觀之。余以其誠。不忍拒卻。乃隨之行。瀕水際。果得怪石。纍纍於峭壁之下。余一一摩挲。移時始謝作驥別去。比反。天已薄暮。心念蕙敦之約。不敢越此室半步。專待其至。良久。足音寂然。盼望益焦急。而蕙敦終不來。越日。余復留候之。東廬早出。比反午餐。一入門。卽謂余

曰。潘蕙敦死矣。其屍尙陳水涯也。余大驚。駭曰。溺死乎。曰。否。斃於槍。謀殺案也。余曰。出事在何地。曰。北岸盡水際。言已復出。余聞蕙敦死耗。惶懼幾暈。絕念彼前者之約。果非讐言。必已挾摘奸人之隱。不幸不慎。轉遭毒手。罹於非命。慘哉。余獨惜彼不語我案之真情。致余無從着手。不能繼承其志。然以理想度之。蕙敦之敵。卽我之敵。同爲敵忌。必盡去而後安。蕙敦不幸。身應之矣。則我之處境。異常危險。昨日作驥在該處引我觀石。至暮。蕙敦卽戕於是。此中大足供余思索。豈作驥實竄伏奸人。我迹之一月未得。蕙敦一日得之。卽了卻殘軀乎。惟就作驥表面觀之。儼然一天真爛漫之少年也。所奇者。作驥之晤面。巧與爲緣。同一日時。同一地點。而謂與此案無關。人誰信之。余此次冒險而來。注意之點在東廬昆仲與

賓年及怪叟。此數者跡顯而明。乃皆不可得。而作驥則誠慙無辜。轉爲罪首。居三旬而不知。我之愚一何可笑哉。正凝神自怨自艾。斗聞剝啄聲作。一客掩入。睇之。林娟妍也。曰。東廬叔外出耶。余應曰。然。曰。潘蕙敦之噩耗。想先生聞之矣。曰。僕適聞諸令叔。曰。島中人對於此事。咸爲扼腕。先生當尤具同情也。曰。然。娟妍曰。妾欲出一游。乞先生偕可乎。余遲疑半晌。乃應曰。可。與之同出。旣行數十武。娟妍猝然止步。曰。余而言曰。馬龍佐先生。幸朝夕小心。毋蹈蕙敦覆轍。余聞突呼己名。震駭膽裂。瞠目癡立。不知所措。良久。囁嚅曰。女士何由而知僕也。娟妍微哂曰。君忘前月尉中佐之至余家。逮捕君乎。當時妾聞君與中佐一席話。已悟疑君之誤。其後細察君行蹤。知君實愛國志士。目的在破間諜之陰謀。大有造於吾島。

妾自恨智識淺陋。以詐億人。致敗君事。罪誠擢髮難數矣。惟妾以爲君旣去。必不復來。不圖未及一月。君竟重來。妾縱不才。自信非有目無珠者。一見而知。所謂霍唐士者。卽君之假名也。雖然。猶未敢堅決。迨前日君與尉中佐同行。妾又竊聞一二語。更設謀使君北岸行。以試探君心。而君果於無意中畢露真相。然後確知馬龍佐之與霍唐士。一而二二而一者也。今得潘蕙敦之死耗。知事勢日逼。君所處之地位。異常危險。不得不協力以謀抵制。故特來前一揭君之假面具。蓋妾雖齒穉無知。而純然爲蘭西土著。生於斯長於斯。卽存亡榮辱繫於斯。他非所長。惟此愛國一片熱忱。則歷刼不磨。可矢天日而無愧。君旣舍身爲蘭西謀。妾安敢無半臂之助。是以不揣冒昧。向君一剖心腹。請君勿疑。余至是始瞿然醒豁。

然悟。亟鞠躬致謝曰。女士誠巾幗英雄哉。垂愛若斯。感幸無既。僕則自誤誤人。咎由自取。於人何尤。娟妍曰。然則願聞君來島之始末。余舉空中之墮。北岸之逢。一一告之。娟妍曰。據此。則間諜爲德產。斷然無疑。敢問其次。余述史家之宿。醫室之見。輝烈之疑。娟妍曰。君疑予叔與賓年可也。疑及家君。似有未當。余曰。僕固疑東廬。因同胞關係而及其兄。迨北岸之巡。崖間之擊。益使僕有戒心。乃述是夜遇險事。娟妍曰。否否。妾敢矢言非家父所爲也。敢問其次。余賡言途旁怪叟。及老農二次所見語。娟妍曰。此必北岸之人。故裝怪態。以惑君之視聽。君以爲奔向海濱去。斷非附近鄰舍之人。確是至理。敢問其次。余又詳敘擊石之戲。兼涉作驢之問答。暨崖間之腕創。北岸之觀石。且曰。昔者女士嘗語僕夜巡之責。北岸爲

賓年。斯言僕至今未忘。加以受創後。忽逢此君。僕是以於賓年未能釋然也。惟賓年之來。得自作驢之報告。與夫觀石之舉。卽值蕙敦被戕。僕又不能不疑作驢矣。娟妍一一傾聽已。默然久之。曰。左證不足。未能臆斷。然今日固一髮千鈞之勢。君幸自愛。毋蹈於禍。余曰。是奚足懼。且僕亦非一無戒備者。娟妍曰。敢問戒備之方。余曰。僕已擬就電文。急則致余表弟尉約翰。乞其援助。又何足慮。曰。電文云何。曰。速來林東廬醫室。數字足矣。娟妍曰。然則今日胡不卽發此電。余曰。時機似尙未熟耳。娟妍又默然。時余二人已行抵輝烈之第。娟妍邀余入。余辭以日暮。乃歸。旣歸。思娟妍一荏弱女子。物色英雄。深識過人。直令余輩鬚眉愧色。就寢以後。覺娟妍之一顰一笑。一言一動。靡不印入余腦海之中。惓惓未能稍釋。翌日。

晨起。東廬又他出。余獨居無侶。方躊躇今日進行。忽侍者引一農人來。手袖珍日記一本。謂欲面謁醫士。余詢其故。農人云。適與同伴游經北岸。至潘蕙敦陳尸處。於其旁石隙中得見此日記。知關係要。不敢隱祕。故特貢於醫士。余命留下日記。待醫士歸呈閱。農人遂去。余竊披覽其文。末有一行云。敖賓年與其黨之謀主。從未辨。又湯農居某地。史農居某地。師農居某地。葛農居某地。麥農居某地。凡五人云。余閱竟。心頗訝異。念蕙敦所得者。僅此數者已耶。推其意。彼所謂之奸人。非敖賓年。卽林東廬也。而若湯若史等農。在理爲嫌疑犯。雖然。日記之發現。出自彼農之手。未可憑信。余於是袖此記。往訪娟妍。請其一決。比抵林氏之門。娟妍適從後馳來。呼余問何事。余不暇寒暄。逕告以前事。并出日記授之。娟妍細察。

一過。曰。此僞記也。君試辨其筆迹。實出兩人之手。此必奸人故弄狡獪。藉以亂人耳目。以爲金蟬脫殼之計也。余曰。微女士言。僕以記出農人之手。固已疑之。惟令叔果無罪證。余必以此事質諸令叔。而信心始堅。卽令叔亦可因是而明其心迹。娟妍曰。君言良是。但妾則無術以明家叔之無辜。君自質之。當然疑解耳。余笑應之。遂別。馳返醫室。東廬未歸。歷午及暮。依然不至。更柝初催。始聞東廬足音。蹀然由戶而堂。而室。余靜俟之。東廬排闥入。坐既定。余猝然以日記示之。曰。潘蕙敦之日記。適自農人繳來。囑面授君。盡一誦諸。東廬茫然。余重申其說。東廬受閱竟。曰。此何意也。余故厲聲喝之。曰。汝尙欲作僞耶。同黨幾人。速自吐實。言次。出手槍示之。東廬不懼。轉問余曰。爾何人。曰。余卽馬龍佐。昔日之來。而汝謂爲怪。

客者。今奉海軍將令。特來除奸耳。東廬囁嚅曰。我有何罪。余曰。他姑勿論。但言昔者室簾何爲無故下。賓年曷爲無故去。東廬笑曰。若此。則並無不逞之謀也。吾初居英倫。徒以婦人之累。如蠶絲之自縛。不能遽脫。吾兄乃招余來此。省躬思過。以了餘生。吾習歧黃。不嗜酒。而敖賓年則酷好杯中物。苦於例禁。僦居於我。藉就醫之名。使余供酒。余利所入之豐。因而納之。曩者子登余門。賓年適舉觴。恐爲人見。洩言於外。故下簾避子。迨上月約解。賓年以事去。卽賓年之爲人。吾亦可保。其無他。據此。則安有犯罪行爲。可以證實哉。東廬言時。理愈直。氣愈壯。余至無一言可以辯駁。私念潘蕙敦之日記。必係僞造。不然。賓年去久。東廬與余朝夕相對。使果有不法之心。余豈有不能覺者。正遲疑未決之頃。鈴聲大作。門闢處。尉

約翰中佐挺身直入。一見余。卽曰。龍兄。急電召予。奚爲。余訝異曰。誰發此電。捏冒余名。約翰出電示余。余誦之曰。速來林東廬醫室。見我不在。立赴史備德莊。毋延。余曰。吾弟何時接受此電。曰。接收後。恩遽卽來。余曰。怪哉。約翰曰。兄必洩謀於他人也。余曰。娟妍一人外。實無知者。是必娟妍代發耳。東廬接言曰。娟妍奚爲者。約翰曰。彼旣若是云云。余儕須速赴史莊。相機而動。余極口稱善。東廬曰。不才偕行何如。余曰。君須立誓則可。東廬果誓。余審其志之純篤。疑團盡釋。於是余奮然居先。東廬次之。約翰爲殿。各備器械。魚貫向史家進發。時已深夜。雲陰無月色。四顧昏闇。咫尺不辨。萬籟皆寂。方行至半途。一人迎面馳來。疾若飄風之至。余三人急伏道旁叢樹下以覘其變。未幾。足音愈邇。余探首外望。審其人。正是密

司娟妍。踴躍而出。約翰東廬繼之。娟妍驟覩余三人。大喜過望。曰。君等同來。妙甚。言次。出一物投諸余。曰。證據在是。余視之。紺色。僞髮一縷。正前者怪叟之化裝品也。余詢得自何處。娟妍喘曰。史備德家。諸君幸勿辭勞苦。踵隨妾後。速往擒之。緩則賊逸矣。言罷。拔足返奔。余三人緊隨之。不數秒鐘。抵其門。躡足同進草屋。屋卽余向者住宿所也。搜其中。貯有網繩斧斤數事。復於屋隅什物堆中。發現一木篋。約翰出燐寸燃燭照之。娟妍力掀其蓋。蓋啓。一一取其藏物。如白髯。如敝衣。赫然在焉。余曰。此與紺色之髮。同爲怪叟所御者。又長鑱一。余凝視恍然。頓悟北岸夜擊我者。卽此物。又兵刃鎗械若干具。約翰曰。此奸人所恃之利器也。最後得酥酪兩斷片。中空。可儲物。約翰曰。此奸人燬艦之媒介物也。大抵奸人蓄謀。

肆毒。匪一朝一夕。是必以炸藥製鍊成粉。實諸酥酪之中。售彼軍士。軍士不察。誤置受熱之地。或稍觸擊。致立時爆發。而罹於禍。奸人之計。亦毒矣哉。余曰。然則此酪定自初試未成。再爲而始見效耳。約翰未答。旋聞履聲橐橐。一人由內出。將欲入此室處。約翰急滅火。余等四人悉伏暗陬以待。其人行近草屋。目光閃爍。四矚不已。余粗辨其面目。宛然海涯雨服人也。余乘其不備。突前以手槍擊之。其人應聲倒。約翰東廬同時躍出。力按其人於地。是人雖被傷。而孔武有力。尙抗拒不已。久之。力不敵而屈服。約翰燭之作驢也。方操德語痛詈。余雖嫻習德文。尙不能盡解其義。約翰曰。彼究何人。余曰。卽向所述史老幼子作驢。余誤爲誠慙無辜者也。娟妍曰。幼子乎。妾未聞作驢而爲史姓者。余曰。非史老之子耶。恨余知

之不早也。時娟妍已覓得繩索至。遂共縛作驢甚固。娟妍昇東廬手槍。命監之。余率約翰娟妍入內。史備德繼祖及其母女方欲就寢。約翰至前厲聲叱之曰。爾衆速就縛。毋動。動必死。作驢已就擒矣。史老變色戰兢言曰。將軍何來。約翰曰。余奉海軍將令至此。作驢爲敵國間諜。罪狀已明。汝爲同黨。速實供毋隱。史老震懼。言二年前有客來游島。謂愛此地幽僻。宜於養晦。出而挈作驢同來。語我以此子不幸見棄於父母。渠憐其單弱。攜至此間。以金贈我。令予子育之。而不使任勞。作驢來時。性殊戇拙。恆終日獨行島中。不飲不食。忘其飢渴。或夜深不歸。露宿竟夕。亦不知倦。隨身有木篋一。欲其扃閉。輒以足蹴之。家人憐其戇。爲備鎖鑰。嗣後游客瞻視作驢。尙來二三次。迨歐戰宣告以後。始絕迹云云。約翰聆其一席。

語。卽亦不置可否。出與東廬共舁作驢入。連同一千人犯待解司。令部聽候軍法裁判。又謂余曰。龍兄試傳予命赴艦召人。弟尙須留此。與林醫士監視若輩也。余曰。諾。且目注娟妍曰。女士歸尊府。偕往何如。娟妍首肯。於是兩人同出。道徑崎嶇。乃攜手相將以步。余謝娟妍曰。今日奸人就縛。實出女士之賜。但女士何由而知是作驢。娟妍曰。此卽君語我耳。君疑賓年作驢二人。致不能決。妾則舍賓年專注作驢。擊石之問答。北岸之觀石。罪證固彰彰矣。妾昨夕探史老家。詢知蕙敦被戕之日。卽作驢外出未返之時。且作驢性好夜游。輒以爲常。亦一異點。史老更述木篋自扃事。以爲笑柄。妾益滋疑。今晨嬌君命電召中佐。明知得可唾手。午瞰作驢他出。私發其篋。卽獲得紺髮白髯等證。益信北岸之逢。水涯之擊。怪叟

之裝。崖間之創。幼艦之燬。悉出一人之手。及暮。遲君未至。乃懷證物疾馳報君。而君偕諸人適蒞臨。是以一舉成功耳。余曰。以僕之愚。致使女士蒙不測之險。僕實撫衷內疚矣。娟妍曰。君爲吾島謀。且不惜身。妾又何敢自愛。余曰。今夕功成。一旦微女士力。曷克至斯。設僕不遇女士。冒昧爲之。深恐身且不保。遑言其他哉。娟妍遜謝不已。及抵其家。彼與余別。余則馳赴泊艦處。以中佐命召十士行。重返史家。曙色已動。於是約翰率彼部曲。拘捕作驥等人登艦。余與東廬仍返其居。詳述余始終來島意。東廬聞之。不勝嘆服。翌日。約翰一早過余。余方盥洗。約翰覩余。鼓掌曰。廬山真面。今又重見矣。余笑領之。約翰邀東廬與余同謁輝烈。輝烈得其女報告。已盡知顛末。相與嘆息不置。午餐後。約翰辭去。輝烈固留余下榻。其

家。余允之。語約翰曰。吾觀此島凡四變。初以爲迷島。繼曰桃源。又繼爲虎穴。今直以樂土視之矣。約翰笑撫余肩曰。兄居此間。以弟觀之。殆猶不止於樂土。其將爲溫柔鄉歟。相視而笑。兩人遂別。




(譯 新)

(撰 新)

二冊
八
角



娜蘭小傳



綠波傳

一冊
二角五分

本書寫真地美人俠女。合一體而治之言情則矢志不二言侯則復死如歸言武藝則出羣而英雄言意氣則超越而肝膽讀之覺可泣可悲亦復可喜可慕。

本書述一極貧獨邸。却富女婚貧女閱盡艱難終成美滿良緣種種助力不期均爲其種種助力原著體物繪情純用白描其負有盛名也固宜譯筆亦能斟酌盡善。

新小說

俠情 俠賊小史 一冊 二角

猶太人某。以重利借貸為業。有拉佛爾氏抱不平。因百計以破壞之。折老猶之饑牙。拯他人於死地。為拉氏生平第快舉。事節變幻。得未曾有。

國際 玫瑰劫 一冊 二角

意大利藩王維勃。無故失蹤。王素忠讜。有公爵立特者。主張聯俄。跡近賣國。王與反對。不遺餘力。俄人忌之。國人因疑國際關係。後公爵為人暗殺。偵探從事此役者。多一時名手。卒不得當。最後公爵忽與某閨秀結婚。王亦於牧師宣讀結婚證書時。自神座前地窖中出。蓋閨秀亦王之情人。公爵以嫉寵之故。不置王於死地也。

言情 三人會 三冊 六角

譚氏子。故世家。婚於顏。已而中落。其舅某。因而為利。以陰謀死譚父而奪其妻。譚某然墮入街中。最後惡人自斃。事乃大白。書中形容小人陰賊險狠。如吳道子畫鬼。窮形盡相。

中華民國八年七月初版

(風島女傑一冊)

(每冊定價大洋貳角)

(外埠酌加運費)

編纂者 羅文亮

發行者 商務印書館

印刷所 上海北河南路北首寶山路 商務印書館

總發行所 上海棋盤街中市 商務印書館

分售處 商務印書館分館

北京 天津 保定 奉天 吉林 龍江
濟南 太原 開封 洛陽 西安 漢口
杭州 蘭谿 安慶 蕪湖 南昌
長沙 常德 成都 重慶 梧州 雲南
廣州 潮州 香港 桂林 新加坡
貴陽

此書有著作權翻印必究

